

Եզնիկ ծ. վրդ. Պետրոսյանը Վեհափառ Հայրապետին ծանոթացրեց նորաստեղծ թեմական խորհրդի անդամներին և հանգամանորեն ներկայացրեց խորհրդի կողմից մշակված աշխատանքային ծրագրերը: Հոգեշնորհ Հայրը մասնավորապես նշեց, որ շուտով տեղերում ևս ստեղծվելու են համապատասխան ծխական խորհուրդներ, որոնք մեծապես կնպաստեն, որպեսզի մարդիկ ավելի մոտենան Եկեղեցուն, առավել հզորանա հավատքը նրանց մեջ:

Վեհափառ Հայրապետը մեծ ուրախությամբ ողջունելով թեմական խորհրդի ծնունդը՝ հաջողություններ մաղթեց նրա ձեռնարկներին և նշեց, որ Մայր Աթոռը անհրաժեշտ օգնություն և աջակցություն կցուցաբերի թեմի աշխատանքները ճիշտ կազմակերպելու գործում: Նորին Սրբությունն ընդգծեց նաև, որ թեմական խորհուրդների ստեղծումով ժողովրդի մեջ կաշխուժանա հետաքրքրությունը դեպի հոգևոր կյանքը, դեպի Հայաստանյայց Ս. Եկեղեցին և առավել գործունե կդառնա կապը Մայր Աթոռի և թեմերի միջև:

ԳԱՐԵԳԻՆ Ա ԿԱԹՈՂԻԿՈՍՆ ԸՆԴՈՒՆԵՅ ՌՈՒՍԱՍՏԱՆԻ ԴԱՇՆՈՒԹՅԱՆ ՄՇԱԿՈՒՅԹԻ ՆԱԽԱՐԱՐԻՆ

Մարտի 10-ին Մայր Աթոռ Ս. Էջմիածին այցելեցին ՌԴ մշակույթի նախարար Եվգենի Սիդորովը՝ տիկնոջ հետ, և Կրեմլի թանգարանների գլխավոր տնօրեն Իրինա Ռադիմցևան՝ ուղեկցությամբ Հայաստանի մշակույթի նախարար Արմեն Սմբատյանի:

Պրն. Սիդորովը, Վեհափառ Հայրապետին փոխանցելով Ալեքսիյ Բ Պատրիարքի ողջույնները, տեղեկացրեց, որ Հայաստան իրենց այցելության գլխավոր նպատակներից մեկը հունիսին Կրեմլի սրահներից մեկում բացվելիք ցուցահանդեսի կապակցությամբ անհրաժեշտ պայմանավորվածություն ձեռք բերելն է: Ցուցահանդեսը նվիրվելու է Հայաստանում քրիստոնեությունը պետական կրոն հռչակելու 1700-ամյակին և ցուցադրանքում տեղ կգտնեն բացառապես Ս. Էջմիածնի թանգարանների արժեքները: Ինչպես նշեց տիկ. Ռադիմցևան, ցուցահանդեսի բացումը կհամընկնի մեկ այլ կարևոր հորելյանի ևս՝ Մոսկվայի հիմնադրման 850-ամյակին:

Վեհափառ Հայրապետը, բարձր գնահատելով այդ գեղեցիկ ձեռնարկը, ողջունեց նաև այն սերտ գործակցությունը, որ առկա է Ռուսաստանի և Հայաստանի մշակույթի նախարարությունների միջև, և շեշտեց նաև, որ Եկեղեցին պատրաստ է իր գորակցությունը ցուցաբերել այդ գործակցությանը:

Զրույցից հետո հյուրերը ծանոթացան Ս. Էջմիածնի թանգարաններին:

Հանդիպմանը ներկա էին Հայաստանում ՌԴ արտակարգ և լիազոր դեսպան Անդրեյ Ուռնովը, Կրոնի գործոց պետական խորհրդի նախագահ Լազար Սուլջյանը, երկու նախարարությունների աշխատակիցներ:

ՀՈՒՆԱՍՏԱՆԻ ԳՅՈՒՂԱՏՆՏԵՍՈՒԹՅԱՆ ՆԱԽԱՐԱՐՈՒԹՅԱՆ ՊԱՏՎԻՐԱԿՈՒԹՅՈՒՆԸ Ս. ԷԶՄԻԱԾՆՈՒՄ

Մարտի 20-ին Մայր Աթոռ Ս. Էջմիածին այցելեց Հունաստանի գյուղատնտեսության նախարարության պատվիրակությունը՝ փոխնախարար Վասիլիոս Գերանիդիսի գլխավորությամբ:

Վեհարանի իր աշխատասենյակում հյուրերին ընդունեց Նորին Սրբություն Գարեգին Ա Ամենայն Հայոց Կաթողիկոսը:

Պրն. Գերանիդիսը, իր ակնածանքն ու սերն արտահայտելով հայ ժողովրդի և նրա սրբություն սրբոց Ս. Էջմիածնի նկատմամբ, խոսեց հույն և հայ ժողովուրդների դարավոր բարեկամության մասին և շեշտեց, որ այն նախ և առաջ բխում է մեր ընդհանուր հավատից:

Զրույցի ընթացքում պրն. փոխնախարարը Վեհափառ Հայրապետին ծանոթացրեց պատվիրակության՝ Հայաստան կատարած այցելության նպատակներին և նշեց այն սերտ գործակցության առկայությունը, որ գոյություն ունի Հայաստանի և Հունաստանի գյուղատնտեսության նախարարությունների միջև:

Խոսվեց նաև Հայաստանի ներկա կացության մասին: Պրն. Գերանիդիսը համոզմունք արտահայտեց, որ հայ ժողովուրդն իր աշխատասիրության և տաղանդի շնորհիվ շուտով կհաղթահարի առկա բոլոր դժվարությունները: Այդ նախապահին նրան կօգնեն բարեկամները՝ հանձին Հունաստանի:

Նորին Սրբությունը ողջունեց երկու նախարարությունների միջև առկա սերտ գործակցությունը, նշեց, որ այն իր ուրույն արտահայտությունն է գտել նաև հոգևոր ոլորտում և վստահություն արտահայտեց, որ մեր օրերում Հունաստանի և Հայաստանի բարեկամությունն ու գործակցությունը պետք է ավելի զարգանա և խորանա:

Հանդիպմանը ներկա էին Հայաստանում Հունաստանի արտակարգ և լիազոր դեսպան Յակովոս Սպեցիուսը, Արմավիրի մարզպետ Սեդրակ Հարությունյանը, Հայաստանի գյուղատնտեսության փոխնախարար Իշխան Մարտիրոսյանը:

